



咨



大總統咨參議院議決國務院官制文

現在國務總理唐君業已來甯國務院官制尙未擬定組織一切將何以爲依據昨經本總統令飭法制局迅擬國務院官職令草案以便依用茲據呈送前來相應咨請貴院迅賜議決至要此咨

附法制局原呈

爲呈送事案奉三月二十五日大總統令開現今國務總理唐君業已南來各部國務員行將發表查國務院官制尙未擬定將何所憑據以事組織爲此令仰該局迅將國務院官職令草案擬定呈送前來以便一面交參議院議決一面交唐總理暫行依用勿延片刻切切此令等因奉此卽交編制員迅速起草毋稍延緩茲國務院官職令草案刻已擬就謹繕摺呈請大總統鈞鑒是否有當伏乞裁核施行謹呈

計呈國務院官職令草案清摺一扣

大總統咨參議院提前議決三月分概算表册文

據財政部長陳錦濤呈稱本部彙編三月支出概算表冊已於本月十五日呈請轉咨參議院核議在案惟查此項支出概算表冊既以月爲綱自應於月內核定以便按款支付現在臨時政府交卸在即各部院紛紛按照概算草案請領三月分經費本部處此旋渦苟欲照付則法律之手續未完不付則支給之事實已至徬徨終日應付無方不得不呈請大總統咨會參議院將各部院三月分概算表冊迅賜議決務在本月內公佈俾領款者知所遵循發款者有所根據等因前來查現在已屆月杪所有本月豫算表冊理應即日公布俾有遵循爲此咨請貴院將前次咨請決議之三月分概算表冊卽予提前決議咨復以便轉飭遵照是爲至要此咨

內務部據江浦商會浦口議事會爲內務司馬良誣讒人民據實糾正
事咨司法部文

茲據江浦商會浦口市議事會爲馬良誣讒人民據實糾正呈請飭令告退事具呈附議案五條并鈔錄馬良告示原文均另鈔附等情據此查內務司非地方行政官廳不應有干預地方行政及揭示人民權限乃馬良以內務司名義發示將龍泉一帶地段擅行支

配并發起創設龍洞山莊附設座湯醫院暨各種事業不惟侵越地方行政職權且其通告及湯泉告示詞義又顯有謾罵訕笑及種種悖謬情形殊失民國執政官體式及尊重地方人民之態度今據該呈實已不孚人望衆共異之究未便置輿論于不顧也爲此咨行貴部請卽令行南京審判廳察究辦理此咨

令示

大總統令陸軍部撫卹鄒謝喻彭四烈士文

頃據川人黃復生等呈稱四川前後起義死難者甚衆以鄒容謝奉琦喻培倫彭家珍四烈士功績最爲卓著請照陸軍大將軍陣亡例賜卹并請崇祀忠烈等因前來案查鄒容當國民醉生夢死之時獨能著書立說激發人心喻培倫則闡明利器以充發難軍實彭家珍則殲除大憝以收統一速效所請賜卹崇祀各節着卽照准惟謝奉琦丙午在蜀運動起義組織各縣機關等因雖其功在民國不小究與鄒喻彭三烈士之功略有區別着改照陸軍左將軍陣亡例賜卹仍准崇祀忠烈祠以慰忠魂而垂不朽除批示外合行令仰該部知照原呈並發此令

附黃復生等呈

四川公民黃復生李肇甫熊成章吳永珊林啓一廖炎張楸隆淡春谷陳一夔陳六謙彭丕昕王夏李功照吳國楨吳麟馮贊翰奎鄭謙尹騫尹侗尹稜胡國樑胡國棟臧靈臧錫鑾李爲綸方貞吉余耀榮李沛方化南雷昭性易昌楫向迪琮羅用霖袁朝佐余切杜關萬樹芳翁雲舫鄧至誠鄧胥功任鴻雋等爲呈請優恤以彰忠烈事竊維自川路風潮暴起四方相繼響應數月之間民國遂以奠定者其成功非一手足之烈其種因實在十數年以內蜀人士奔走革命自獻自靖嘗恐爲天下後前後起義死難者不知凡幾其間功績卓著應首先表恤者厥有鄒容謝奉琦喻培倫彭家珍四人鄒君哀祖國淪陷壬寅歲發憤著革命軍一書洋洋數萬言用以警醒國人當是時舉國人士方醉生夢死趨投韃虜轂中自其書出四方英俊始萌恢復漢業思想設非其人提倡之早其書入人之深今日收功恐難若斯之速乃蘇報獄起自投西獄中竟以瘐死謝君甲辰留學日本歷任同盟會調察評議各要職丙午還蜀運動起義數月來往返成渝間凡十數次各縣機關已組定方圖大舉竟爲宵小所賣被獲不屈而死喻君夙聰

隸知革命非徒恃鼓吹者所能奏功乃專究心炸彈學初得俄虛無黨人製法試驗時屢被炸傷頻卽於死志不爲之少衰後竟發明一種最安全而有効力之炸彈至今各處所應用以奏功者皆其遺法也庚戌六月北京之役其經營最苦用力最多不幸敗露君因先歸日購藥得免辛亥三月廣州之役君手製軍用炸彈數百枚復身赴前敵直搗督署竟以援絕被獲罵賊而死彭君初任同盟會北洋機關部軍務部長值武漢起義遂暗約同志遙應南方往來滬灤京津之間籌款運械聯絡軍隊力圖響應迨南北議和賊虜良弼以宗社黨首領從中阻撓君遂以一彈芟鋤良賊而身亦與之俱殞之四君者或以學說激發人心或以實行瀆其熱血或闡明利器以充發難之軍實或殲除大憝以收統一之速效率皆功在民國身先朝露老親弱息室家淒涼屬在後死尤爲寒心今民國大定前此死義諸烈士如吳樾楊篤生陳天華吳祿貞等皆蒙贈卹附祀昭示來茲民國酬庸之典自當視其功績之鉅細不當以生前名位之尊卑而有所軒輊擬請援吳祿貞烈士例將鄒容謝奉琦喻培倫彭家珍四烈士照陸軍大將軍陣亡例賜卹並請崇祀忠烈祠以慰忠魂而垂不朽是否有當伏乞鑒核批示施行此

呈

大總統批黃興等請指撥大宗經費組織拓殖協會呈

呈悉吾國民族生聚於東南而彫零於西北致生聚之地人口有過剩之虞彫零之區物產無豐阜之望過與不及兩失其宜甚非所以致富圖強之道拓殖協會之組織自是謀國要圖國家應予協助所請維持經費三十萬元仰候令飭財政部編入每年預算案可也此批

大總統批陸軍部請賜卹彭烈士家珍并請崇祀忠烈祠呈

申悉所請已於川人黃復生等呈內批示知矣仰即知照

陸軍部令各軍隊部局學校俸餉伙食按月造報清冊文

爲諭令事按本部軍需局案呈竊維各軍隊部局學校現均次第組織完全所有各處俸餉伙食等項自應按月造冊報部以昭核實查各處前次造送清冊完善者固多而不甚明瞭者亦復不少甚至有逾延多日尙未冊報者殊非慎重公款之道應請分別咨令自本月起每月冊報均限月底一律到部不得仍前稽延並附呈本局擬定冊式二紙呈請

核准印刷通行以昭劃一而便稽核等情前來本部復核該局所呈各節均極周妥自應照准合亟冊式諭發諭到仰卽遵照毋違切切此令

計諭送冊式二紙

陸軍部令各師長速造報服裝詳細清冊文

爲令行事竊以南北統一各處軍隊均經本部分別編制在案查所有服裝等項非速詳報難資稽攷爲此令知各師長速飭所部將原有之數若干已領之數若干從前領款自辦之數若干現在不敷之數若干仰卽分別趕速造報詳細清冊限於三日內彙齊呈繳以憑核辦遵照勿延切切此令

陸軍部令各軍造報公費決算文

爲諭令事據本部軍需局案呈竊維俸給爲官佐保持品位而生公費爲軍隊購買物品而設性質各有不同辦法亦各有別是故各軍或師司令部以次均有公費一項已分別詳細規定於陸軍暫行給與令中早經通行辦理在案乃近來各處公費均照數目領去而造具決算報部者殊屬寥應請咨行各軍查照報辦以重公款而便稽核等情前來本

部覆核該局所呈各情均係正辦自應照准合行諭飭諭到仰即遵照辦理勿違切切此令

交通部令上海電政總局遵減報界電費并轉令各分局文

前奉大總統令開上海日報公會呈稱軍興以後種種困難情形請減輕郵電費以維持報界等情前來查報紙代表輿論監督社會厥功甚巨此次民國開創南北統一尤賴報界同心協力竭誠贊助茲據呈稱軍興以後困難情形均屬實况若不設法維持勢將相繼歇業合將原呈發交該部仰即酌核辦理等因奉此同日又據日報公會呈同前由到部當經本部議得報館郵電各費業已從廉今風氣漸開民國境內報館林立再經輕減郵電歲入所損必巨第灌輸智識導進富強端賴報紙竭力鼓吹前功既偉後效尤宏郵電各費若不量予核減報價因之增加直接為報題發達之障礙間接即為開通社會之阻力是郵電之營業固宜維持報界之困難尤應體恤不得已擬將嗣後關於報界之電費照現時已定價目再予減輕四分之一郵費減輕二分之一呈復大總統察核在案茲奉批開呈悉所擬酌減報界郵電費辦法尙屬妥協應即照准仰即令行所屬知照至請

電袁大總統轉飭北京郵局帛黎遵辦一節已電告袁大總統矣仰知照等因奉此除郵局減費應俟袁大總統飭令遵辦外合行令知該局以後各處報館及訪員等所發電信一切規則仍照原章辦理惟核收電費照原定數目再減四分之一以示優異此係爲提倡報紙開通社會起見仰卽轉令各分局等一體遵照切切此令

交通部令各省郵政局減輕報界郵費文

案奉大總統令開據上海日報公會呈稱軍興以後種種困難情形請減輕郵電費以維報界等情前來查報紙代表輿論監督社會厥功甚巨此次民國開創南北統一尤賴報界同心協力竭誠贊助茲據呈稱軍興以後困難情形均屬實况若不設法維持勢將相繼歇業合將原呈發交該部仰卽酌核辦理可也等因同時又據日報公會呈請減輕郵電費到部當經本部議妥擬嗣後凡關於報界之電費悉照現時通行價目減輕四分之一郵費減輕二分之一呈覆大總統在案茲奉大總統批開所擬酌減報界郵電費辦法尙屬妥協應卽照准仰卽令行所屬知照至請電袁大總統轉飭北京郵局帛黎遵辦一節已電告袁大總統矣仰卽知照此批等因嗣後凡遇各報館曾經掛號由局認可之

新聞紙所有寄費自陽曆四月一日起悉照現時通行價目減去二分之一爲此令知該郵政總辦仰知照所屬各郵局一體遵行並將遵辦情形報部查核此令

內務部批江浦商會浦口市議事會爲內務司馬良誣讒人民據實料
正並請飭令告退呈

批據呈附議案五條并抄錄馬良妄示均悉查內務司非地方行政官廳不應有干預地方行政及揭示人民權限乃馬良竟以內務司名義出示將湯泉一帶地段擅行支配並爲發起人創爲龍洞山莊附設座湯醫院暨各種衛生事業不惟侵越地方行政職權且其通告及湯泉告示詞議又顯有謾罵訕笑及種種背謬情形殊失民國執政官體式及尊重地方人民態度舛戾姿睚實民國行政界之敗類來呈及議案各件已照鈔咨行司法部請卽令行南京審判廳察究辦理矣此批

司法部批江甯地方審判檢察廳長楊年劉煥組織高等審判檢察兩
廳請備案呈

呈摺均悉查審判檢察各廳關係人民生命財產至爲重要各國法律均無各級兼任之

規定本部成立伊始正事調查全國司法各級機關及辦事人員以冀統籌全局逐漸改良該審判檢察兩長以南京民國首都不能無上訴之機關亦應先行據情稟報核准俟呈請大總統後方能委任開辦該員等竟於上月二十八號組織高等審判檢察兩廳所有辦事人員仍以該地方廳人員兼任殊屬不合所請備案實難照准此批

司法部批蔣彥邦等擬組織法稅男女兩學校請立案呈

呈及簡章均悉查該生等糾合同志組織法政男女兩學校所有經費均由自行担任以冀養成國民法政智識熱心教育殊堪嘉許惟蠶桑講習所與理問廳地址係屬地方民政上管轄應即呈請該管官廳核辦本部未便越俎至文官法官辯護士資格必俟部章頒行始有根據女子參政權必經議會通過方可實行該簡章宗旨皆在此兩事未決以前碍難照准如該生等專以研究學問爲目的着即依據法政學堂堂章程逐條更正再行呈請立案可也此批

司法部批日本警務畢業生關靖華等籌辦司法警官養成所請立案

呈

呈及簡章均悉司法警官一項亟應造就專材所陳不爲無見惟本部正在計畫自有正當辦法茲檢閱簡章諸多未協如第一條定名司法部司法警官養成所尤爲侵越本部權限所請由部立案之處碍難照准章程發還此批

司法部批李永齡等請承認組織臨時律師會呈

呈及簡章均悉該生等爲保護人民權利慎重訴訟事件起見擬組織臨時律師會意屬可嘉但律師會會員必須具有律師身分者方爲合格律師身分應以法律規定縱有臨時錄用者亦必係臨時規則所認許此等事件本部自有斟酌該生等所請着毋庸議此批

教育部批民國法政大學請予立案呈

呈悉該校就兩江法政學堂開辦法政大學所稱俟將來學校令頒行後再行遵照辦理各節尙屬可行應暫准予立案此批

教育部批皖全椒縣初等商業學校請示改辦初等實業辦法呈

呈悉本部學校令尙未頒布該校辦理畢業分配課程各節祇須不背共和宗旨可暫行

照舊辦理此批

教育部批江甯兩等小學請咨陸軍部出示保護校舍呈

呈悉查該校業已開學上課自未便駐紮軍隊已如呈轉達陸軍部請其出示保護矣此批

教育部批達彩康等請組織共和宣講團呈

呈悉該黨員等組織共和宣講團以輔助社會教育事屬可行應即准予立案惟地方民智通塞不一宣講時務宜和平剴切善爲勸導不宜稍涉鹵莽切切此批

教育部批安徽師範畢業生楊栗等請續辦亳州學務呈

呈悉查亳州高等小學屬於地方教育行政範圍仰即呈候本省民政長辦理此批

外交部批僑商統一聯合會王敬祥等懇批准興業貿易株式會社呈

呈悉所擬條款章程尙屬妥善查軍械營業於軍國至有關係前清時代絕少此項營業遇有需用軍械時輒由洋行經手或派私人出洋購買價昂而器竄甚者舉朽壞不適用之物品悉以吾國爲最大之銷場言之可爲痛恨該商等有慨乎此特集合鉅款承辦各

項軍用器械以期增殖國力知必能精選新式槍礮等件以供各省之所求其裨益軍國前途良非淺尠仰卽祇遵大總統暨陸軍部海軍部實業部各批示可也此批 三月十日

日

● 紀事 ●

陸軍部請將前清昭忠各專祠分別改建大漢忠烈祠呈

爲呈請事竊維武漢樹義區夏響風國旂燦五色之光政體臻共和之域胥前此殉難諸烈以頭顱代價爲民國前驅當其積憤慎胸熱誠貫日或橫被逮捕而血肉早已摧殘或効死戰爭而姓名終虞湮沒亟宜千秋俎豆用妥百劫忠魂查滿清僭主義士拳旂殺人盈城濫祠各地際今故邦丕振淫祠猶存實無以昭勸懲而別賢否理應將前清昭忠各專祠分別改建大漢忠烈祠彙集各該省盡忠民國死事諸烈入祀其中由本部派專員致奠以後卽由各執政春秋致奠並於每歲八月十九卽武漢起義紀念日新歷二月十五卽民國統一紀念日恭行祀典永爲定制以慰死者靈作生者氣以著褒誅之義一舉而三善備所有前清昭忠及各專祠分別改建大漢忠烈祠除通電各省都督外理合具

文申請大總統鑒核立案實爲公便須至呈者

交通部覆大總統核減報界郵電費辦法呈

竊奉大總統令開據上海日報公會呈稱軍興以後種種困難情形請減輕郵電費以維報界等情前來查報紙代表輿論監督社會厥功甚巨此次民國開創南北統一尤賴報界同心協力竭誠贊助茲據呈稱軍興以後困難情形均屬實況若不設法維持勢將相繼歇業合將原呈發交該部仰卽酌核辦理可也等因同時又據日報公會呈請減輕郵電費到部查郵電費重報價因之增加直接爲報紙發達之障礙間接爲開通社會之阻力矧共和成立報界鼓吹之力居多該公會稟請減輕郵電費前來理應立予輕減以恤商艱而副鈞令惟民國各省報館林立每年關於報界之郵電費其數頗鉅若悉照該公會所請求如數減少則郵局電局所受損失太多報界困難情形固宜體恤而郵電營業前途亦不可不預爲維持以防竭蹶茲經本部郵電兩司公同會議嗣後凡關於報界之電費悉照現時通行價目減輕四分之一郵費減輕二分之一庶商困得以稍蘇而郵電兩政亦不至大受影響但民國電報自有完全主權由本部飭令上海電報總局照議酌辦

當可遵行至郵政現名爲中國自辦實則種種實權仍在北京郵政總局法人帛黎之手帛黎遇事把持久爲國人所共恨卽如此次起義南北未曾統一之時帛黎竟敢將前清郵票私印臨時中立四字交局發行後經本部司員向南京上海各郵局洋員一再阻止始寢不發彼之藐視主權意圖侵越野心勃勃已可略見一斑不料清帝遜位後帛黎復電各省郵局仍令發行尤爲輕蔑民氣之鐵証本部郵政司成立以後因郵政人才缺乏特與上海郵局洋員商定派學生二人入局學習詎未及兼旬帛黎竟電該洋員逼令該生立時出局似此情形我國用行政之權幾歸烏有今日報公會請減輕郵費本部固樂與扶持茲特將郵電兩司合議電費減輕四分之一郵費減輕二分之一辦法呈報鈞案如蒙許可卽乞令下本部卽由本部電達帛黎飭其遵行並懇電知袁大總統就近飭令帛黎遵照辦理謹呈

內務部

土木司長史青
鹽理司長高魯

工監王慶莘
工監程光參

請內務部長准予解職呈

爲呈請解職事竊 職員等前蒙委爲司長工監受寄以來夙夜惟謹每覺才不勝任貽誤匪輕祇以民國初基賢能散佚故勉奉 鈞命承乏其間而區區推賢讓能之心未嘗一

日泯也今者南北統一內閣更新將廣集英豪繼襄國政鞏固共和基礎造人民幸福職
員等亦深幸引退得時勵學有日曩雖留學西歐蹉跎十歲自覺學識尙淺不敢謬膺重
任貽誤前途用竭愚誠請允解職俾得退居草野專事科學益求精進以備將來投効之
用爲此合卽陳明此呈

● 雜報 ●

教育部通告

本部部員俞大純失去符號一個如有人取得者作爲無效特白

本報昨日所登財政部簿記樣式一二三號須用石印遲一週間方能出版




臨時政府公報

雜報

第五十二號

十八



本報暫定則例

- 一 本報爲臨時政府刊行故定名爲臨時政府公報
- 二 本報以宣布法令發表中央及各地政事爲主旨
- 三 本報暫定門類六曰法制曰咨曰令示曰紀事曰抄譯外報曰雜報其
子目見前
- 四 本報日出一册如遇國家紀念日星期日政府停止辦公時本報亦休
刊一日
- 五 政府對於各地所發令示或宣布法律凡登本報者公文未到以本報
到後爲有效
- 六 凡各官署皆有購閱本報之義務唯具印文請領者皆照定價五折徵
納餘另詳前價目表

本報白

本報局設在大總統府內

總發行南京花牌樓太平街四號

分售處南京花牌樓吉祥街印鑄局工廠發行所

南京中華報

南京中正街昇平橋易安精舍

外埠經售處

鎮江 興漢日報

常州大街老王大昌

無錫光復門內新橋二十一號曾瑞武

蘇州城內因果巷四十一號許宅

上海 民立報

大共和報

時報

申報

新聞報

天鐸報

時事新報

啓民愛國報

神州報

上海寶善街公順里仁和號

蕪湖 民立報分館

廣州 中國日報

香港 軍事報

天津 民意報

舊金山 大同報

中西報

少年報

檀香山 自由新報

印刷所 臨時政府印鑄局工廠